

Akademik prof. dr. Helmurt Moritz



Sa velikim žaljenjem i nevjericom smo primili tužnu vijest da je 21. 10. 2022. godine u Grazu je preminuo čuveni austrijski geodet Helmurt Moritz. Rodio se 1. 11. 1933. godine u Grazu. Diplomirao je geodeziju na Tehničkom univerzitetu u Grazu 1956. godine te na istom univerzitetu radio kao asistent do 1958. godine, a 1960. godine habilitirao je za docenta. Godine 1964. postaje privatni docent na Univerzitetu u Hannoveru i redovni profesor na Tehničkom univerzitetu u Zapadnom Berlinu za kolegij Astronomsko-fizikalna geodezija. Sa samo 32 godine postaje predsjednikom Njemačke geodetske komisije koja je u razvoju i napretku geodezije u svijetu odigrala veliku ulogu. Godine 1971. postaje redovni profesor za naučno područje Teorijska geodezija i Fizikalna geodezija na Tehničkom univerzitetu u Grazu, na kojem djeluje do umirovljenja.

Napisao je brojne naučne publikacije i članke, a najvažnija djela su mu *Physical Geodesy* (s W.A. Heiskanenom, 1967.), *Approximation Methods in Geodesy* (S H. Sünkelom, 1978.), *Advanced Physical Geodesy* (1989.), *Earth Rotation: Theory and Observation* (s I.I. Muellerom, 1987.), *The Figure of the Earth: Theoretical Geodesy and the Earth's Interior* (1990.), *Geometry, Relativity, Geodesy* (s B. Hofmann-Wellenhofom, 1992.). Helmurt Moritz smatra se jednim od najpriznatijih predstavnika fizičke geodezije. Njegov rad visoko je cijenjen u cijelome svijetu, dobitnik je, između ostalog, nagrada Carl Friedrich Gauss i Alexander von Humboldt. Bio je član je mnogih nacionalnih i međunarodnih strukovnih društava i akademija.

Na Građevinskom fakultetu Univerziteta u Sarajevu predavao je predmet Fizikalna geodezija prvoj generaciji studenata postdiplomskog studija geodezije.

Obavljao je funkciju predsjednika Internacionalne lige humanista, organizacije koja okuplja brojne istaknute intelektualce iz cijelog svijeta, a čije je djelovanje značajno doprinijelo razvoju civilnog društva i jačanju humanizma među ljudima, uz poseban angažman na afirmaciji Bosne i Hercegovine.

Odlaskom profesora Moritza u geodetskoj nauci ostaje velika praznina. Izgubili smo velikog mislioca, uzora, prijatelja i čovjeka koji je za života postao metaforom istine i pravde.

Admir Mulahusić